

COVID-19: Sidang DUN Kedah berlangsung 25 minit

Astro Awani

16 April 2020

Adie Sufian Zulkefli,

ALOR SETAR: Mesyuarat Pertama Penggal Ketiga Dewan Undangan Negeri (DUN) Kedah Ke-14 berlangsung hanya 25 minit hari ini, di Wisma Darul Aman di sini, dengan dihadiri kesemua 36 Ahli DUN (ADUN).

Menteri Besar Datuk Seri Mukhriz Mahathir berkata, walaupun berlangsung ketika pelaksanaan Perintah Kawalan Pergerakan (PKP) bagi membendung penularan COVID-19, kesemua ADUN mengikuti tatacara yang telah ditetapkan Kementerian Kesihatan.

Kesemua mereka dilihat memakai topeng penutup hidung dan mulut serta duduk dalam keadaan penjarakan sosial yang selamat.

Jelas Mukhriz, mesyuarat pada kali ini terpaksa dilangsungkan bagi mengelak berbangkit masalah undang-undang sekiranya Mesyuarat Pertama melepasi tempoh enam bulan dari mesyuarat sebelumnya, sepertimana termaktub di bawah Perkara 53 (1) Undang-Undang Tubuh Kerajaan Kedah.

Tarikh akhir genap enam bulan adalah pada 24 April 2020, selepas Sidang DUN bagi Mesyuarat Bajet Negeri Kedah 2020 ditangguhkan pada 24 Oktober, 2019.

Setelah ditunda tiga kali, sidang Dewan diadakan hari ini.

Kata Mukhriz, mesyuarat hari ini hanya dihadiri ADUN dan pegawai Majlis Mesyuarat Kerajaan Negeri manakala ketua jabatan atau wakil tidak dijemput, kecuali Pemangku Pengarah Majlis Keselamatan Negara Negeri Kedah dan Pengarah Kesihatan Negeri Kedah.

Tempat duduk Ahli Dewan dan yang lain dijarakkan, selain semua yang hadir diimbangi suhu badan dan menggunakan cecair sanitasi tangan.

Setiap Ahli Dewan dimestikan menandatangani surat deklarasi tahap kesihatan sebelum memasuki kamar DUN.

Hanya satu usul dibentangkan dalam mesyuarat kali ini iaitu Laporan Ketua Audit Negara kepada Jawatankuasa Kira-Kira Wang Negeri Kedah.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-sidang-dun-kedah-berlangsung-25-minit-238600>